



Redaksioneel

Ons is weereens bevoorreg om nog 'n uitgawe van *In die Skriflig* aan ons lesers aan te bied. In hierdie uitgawe gee die bekende Potchefstroomse filosoof, B.J. van der Walt perspektiewe oor 'n Christelike samelewingsbeskouing. Hierdie tema is vir die gereformeerde teologie van die uiterste belang, veral in die huidige tydsgewrig in Suid-Afrika waarin die godsdiens enersyds so maklik vergeestelik en andersyds so maklik veramptelik word. Dit is nodig dat ons weer wetenskaplik besin oor die aard en roeping van verskillende samelewingsverbande binne die koninkryk van God. Veral is die sosiale roeping van die geïnstitueerde kerk weer van belang soos blyk uit die teoenemende politieke rol wat kerke begin inneem as deel van die burgerlike samelewing se konfrontasie met die sterk sentrale regering. Is dit byvoorbeeld die taak van kerke om as moniteerders op te tree by verkiesings in buurlande en in hoeverre moet die kerke hulle besig hou met voorgestelde wetgewing? Gaan dit nog om kerklike sake op 'n kerklike wyse soos art. 30 van die Dortsse kerkorde bepleit? Hopelik stimuleer die besinning van Van der Walt diepsinnige nadenke oor die saak in gereformeerde kringe.

E.J. de Beer lewer 'n verdere artikel oor sy spesialiteitsterrein in die Christelike etiek, naamlik die arbeidsetiek. Arbeidsetiek bly uiters aktueel in Suid-Afrika vanweë die steeds hoë vlakke van werkloosheid. Sy artikel wil juis die saak op 'n prinsipiële verantwoorde wyse hanteer. 'n Ander aktuele tema in die arbeidsetiek is die status van die predikant en sy diens in die lig van nuwe arbeidswetgewing in Suid-Afrika. J. Smit wat onlangs hieroor gedoktoreer het, en A. le R. du Plooy, kerkregspesialis fokus op die problematiek wat hieruit voortspruit en kom tot helder konklusies wat van groot belang is om die regsposisie van die predikant se diens in perspektief te stel met behoud van kardinale gereformeerde kerkregtelike beginsels.

Wetenskaplike artikels vanuit die Bybelwetenskappe is vir 'n gereformeerde wetenskaplike tydskrif, wat die *Sola Scriptura* hoog ag altyd van besondere waarde. Ons het die voorreg om 'n artikel aan te bied van prof. J. van der Watt, bekende Nuwe Testamentikus van die Universiteit van Pretoria. Hy belig die funksionele gebruik van

herhaling in die Evangelie volgens Johannes. Sy konklusie bied waardevolle riglyne vir enige eksegeet en is ryk aan stof wat met vrug in die prediking aangewend kan word. Eweneens waardevol is die artikel van J.P. Malan en J.J. Janse van Rensburg oor die “saam met Christus gekruisig”-metafoer. Vir die verdere ontwikkeling van ’n Christelike antropologie is hierdie artikel van groot belang.

J. Steyn lê riglyne neer vir die gebruik van die sogenaamde Theophotic Prayer Ministry en lei daarmee die lesers in ’n onbekende terrein in. Hieroor sal nog lank gepraat word – en dit is juis die taak van verkennende en besinnende teologie wat gefundeerd nuwe terreine ondersoek. Nog ’n kollega van die Universiteit van die Vrystaat, J.-A. van den Berg skryf saam met R. de Wet oor ’n pastoraat van narratiewe betrokkenheid in die Lukasevangelie met besondere klem op die Saggeusverhaal. Vir die nadenke oor gereformeerde spiritualiteit is hierdie grondige navorsing baie waardevol. Ons is dankbaar vir die deeglike studies wat ons telkens ontvang op die terrein van die Praktiese Teologie – juis omdat soveel van ons lesers professionele Woordbedienaars is en intens pastoraal betrokke is by die moderne lewensproblematiek.

Verskeie boeke word ook in hierdie uitgawe geresenseer en ons dank aan die uitgewers en die resensente. Die Redaksie beplan ’n feesuitgawe wat moet saamval met die 150-jarige fees van die Gereformeerde Kerke in Suid-Afrika, met wie die Gereformeerde Teologiese Vereniging en *In die Skriflig* noue bande het. Ons nooi dus lesers uit om bydraes vir keuring voor September 2008 aan die redaksie voor te lê. Ons sou graag ’n kaleidoskoop wou aanbied van die jongste navorsing op al die gebiede van die gereformeerde ensiklopedie. Ons vertrou dat u hierdie uitgawe verfrissend en opbouend sal vind.

J.M. Vorster

Redakteur: *In die Skriflig*